

漢魏六朝百三家集

七

藏名外。體道好異。遁跡理影。剗心人事。任性
於蓼水之側。放心於自得之場。情苞六合。德貫
九方。巖栖谷餘。絕際濠梁。於是寂鏡公子。聞而
往說。乃飛車翠蓋。翔駕絳螭。丹旌風轉。碧幔雪
移。映玉軼之綺靡。照銀車之陸離。經九嶠之曼
阻。歷五曲之巔危。路入閬風。道經通谷。橋塗泱
泱。路林蕭肅。石磴穹窿。松關重複。羊腸望斷。邃

路迂餘。攀林稅駕。乃遇藏名之所居。其居則蘚
苔沒砌。幄葉斜林。千峰沓頂。萬仞懸深。南危碧
流。北障芳林。左縈重陸。右背高岑。煙霞罩日。石
澗籠陰。聲諧百籟。響弄千禽。寂鏡公子曰。蓋聞
智者不懷道沒志。遺俗埋名。迷邦碎寶。却粒辭
榮。今欲說子以默語之術。甯欲聞乎。藏名曰。僕
雖幽栖。遠紆名德。甯忘潔已。以受至言。

公子曰。夫怡情託體。寔寄閑宮。跨危樓於插漢。
挂日景於迎風。玩靈華於宜掌。度窈窕於飛虹。

金枝照曜。玉壁玲瓏。文窗洞右。飛閣陵東。桂柱
通光。雄梁亘日。璧鏡鈕懸。抽荷并出。中宿綿延。
長廊周密。青錢碧影。金墀玉律。冬閨溫煦。夏室
含霜。圖以珍恠。畫以禎祥。瓊茅秋藹。綠蕙春香。
植宜男於粉閣。樹君子於椒房。迴風烟於璇題。
垂珠璣於玉箱。文魚水宿。錦鳥雲翔。乃登陟遊。
踐望遠通疎。擢素藕於石鏡。牽蔓草於康衢。若
荆山之琢玉。似隨水之弄珠。若斯官之閑麗。子
能與我而共居。外臣曰。僕遊心蓬葦。未暇斯處。

公子曰。夫靚妝嚴服。託體必嘉。五絲擅美。獨璽
稱華。組帷絜綵。緹服含葩。丹墀聚葉。縷檻飛花。
至如稷下縫掖。泗上章甫。雉緝霜鮮。秦絲園縷。
鳳色龍分。鴛文鵠聚。瑯紛瑤席。綺飾瓊珮。齊都
滑石。南海璚瑁。散似綴珠。離如竝績。蜘蛛弄巧。
越女調樞。夏則桃笙竹席。冬則青氈金鬚。溫麗
瓊臺。密華承寢。當戶之縠。大文之錦。華蒲萄之
綺。衾麗芬若之丹枕。金蘇翠幄。玉案象牀。子能
從我。樂此芬芳。外臣曰。帶索披裘。自得山性。雕

章麗服。未敢攸同。

公子曰。五飪調神。三芝輔性。用康仁壽。以弘貞
正。乃使有伊之徒。調嘗鼎味。九州珍雜。八方豐
貴。名廉天地之聲。殽竭山海之味。蟬鳴秋稻。鸞
領玉精。離紅之膾。勺藥之羹。蒙山擅重。灌水傳
聲。桂蠹石瓊。龍胎鳳肺。四膳八珍。五肉七菜。纍
似穀雜。切均鮮繪。色若紫蘭。紛如紅綵。若乃越
梅變實。楚醴方添。陳晨鳧之美味。薦雉鷩之肥
甜。洗以三危之露水。調以大夏之香鹽。霜薤沸

烈露葵繁舒。芳菰之英。白霜之茹。澄瓊漿之素
色。雜金筍之甘菹。素醪浮氣。酃醪凝清。獻三爵
之踰雅。等千日之芳醴。酌玉斗之英麗。照銀杯
之輕蟻。此亦天下之美味。子能從我而亨之乎。
外臣曰。藜藿可膳。薇蕨堪食。五味口爽。甯假王
盤。

公子曰。若夫釣臺之樂。葛天之歌。飛七盤之妙
節。動六變之清和。綠綺麗琴。丹山寶瑟。縷器倕
雕。孤枝伶律。奏白雪之楚。緩陳亭。蒨之吳。疾躍。

鳥追飛。潛魚伴出。將使漸離擊筊。雍門鼓琴。鳴
繞梁之妙響。發愁眉之清音。至如五陵金穴。六
郡豪家。表流歌於東夏。出秘舞於京華。金鈿設
翠。步搖藏花。遙同暮雨。逼似朝霞。髮鬢如點。纖
腰成削。玉齒笑容。紅妝綽約。疾趨巧步。霧袖芬
波。舒蛾眉之窈窕。委弱骨之逶迤。載金翠之婉
嬋。珥瑤璫之陸離。芬芳於梧春之苑。灼爍於長
州之中。于時斜光西委。薄霧舒紅。隋珠照影。羅
衣從風。觀者方堤。覩者盈淇。令二鸞之綴翼。使

八鶴之增悲。明君爲之歛泣。西施爲之解眉。於是蘭閨寂晚。曲韻相和。對輕風之落景。望明月以清歌。歌曰。酣醕半。今樂旣陳。長歌促節。綺羅人。拂鏡弄影。情未極。迴簪轉笑。思自親。此亦聲音之盡妙。子能從我而聽之乎。外臣曰。淫聲亂耳。未足入聽。方追山壑。永弄林泉。

公子曰。夫心遊百氏。理與六經。樞機性道。陰陽窅冥。昭玉牒於年史。覽石記而照情。若夫鄒枚上客。揚馬俊人。揮金入趙。易服歸秦。賣舌彈劍。

買義追仁。商權萬古。弋釣陶甄。池中水黑。席上
稱珍。判二氣之氛氲。辨六爻之終始。鳥變龍工。
鳳書雲紀。辭弘八索。辨崇三耳。至如范睢折肱。
豫讓拉齒。禮竭中心。報深國士。碎玉爭城。藏圖
解劍。見碣石之金堤。望楚都之揚塹。美陳平之
反間。揖子房之智謀。想秦君之傳器。仁漢后之
解裘。此亦天下之奧籍。得性之林圃。子能同覽
悅目。以齊此心。外臣於是色動清顏。頓解高意。
曰。僕雖野陋。頗悅帶經。但負薪多疾。未甘斯說。

公子曰。夫氛氲構象。純雜不同。共工折桂。雖播
英風。自古而然。曾何足道。但吹沙役寇。抑自羲
年。吐霧藏妖。聞之堯日。至於今者。昌運天啓。握
歷寶年。風猷駕層漢。道德漏重泉。至如立蹄外
境。紫舌頑人。悖而無禮。不沐皇仁。於是騰三泉
之宵漫。載五旗之飄揚。引玉車於西隴。鳴金鼓
於北邙。拭龍泉之雄劒。瑩魏國之寶刀。鈇踰巨
闕。利擬豪曹。至如牽鈎壯氣。斗膽雄心。緣腰白
土。帶珮黃金。酬恩報死。尅遠長岑。騶裊白鷺。耀

躍青離、五玉察善、十相無遺、連腰錦帶、半足塵
飛、標威於鴈門之境、振旅於龍突之鄉、若乃驚
沙絕岸、苦霧綿長、秋河曉碧、落蕙山黃、紅顏素
改、玄鬢斑霜、征夫抵掌而飲膳、壯士憤氣而沸
腸、迴雲鳥之密陣、背却月而相望、旗纔轉而漂
杵、鋒未至而驂傷、前鋒紛其易幟、後騎決其沙
囊、何湯雪之能比、豈拾塵之可方、於是呼韓頓
顙、龜茲銜璧、羊率旣袒、熊山已積、九截同文、八
極齊軌、帝曰、念功、班茅賜履、青紫如拾、賞歸詔

美此亦天下之壯績，子能從我而效之乎？外臣
曰：葛伯不祀，雖聞湯誥，野叟力弱，未敢振衣。

公子曰：堯舜垂拱，煥彼前聞；今惟聖歷萬代，一
君，璧儀照氣，玉井珠分，德合天地，道方華勲。滄

海碧徹，黃河

一作流

黛文，愛人育德，澤等春雲。

一作

工宣尼茂典，周姬禮容，黃裳進士，清襟俊童。邦
知改俗，國化移風，賣藥無藏名之老，河泗無洗
耳之翁。德星夜映，慶雲晝色，異艸雙條，靈禽比
翼。狐尾旣九，茅脊復三，金船漾寶，銀甕呈甘，康

歌壤笑悅禮樞談隆周謝德盛漢知慙慈照無
礙化湛靈覺散漓弘淳拯澆敦朴國被仁壽家
欣教學三明鑒道六度弘風出塵照苦入冥觀
空善識無盡因性必通天不愛寶地無隱瑞百
神受職三苗奉義石策紫泥繩金玉刺或託諷
梁甫權臥德而龍盤或織箔渭濱恥藏名而鳳
跂於是露點飴密溜泓澄於玉掌雲垂五采覆
旖旎於仙樓漾醴泉於浪井拂垂楊於御溝或
聯七葉一姓五侯外臣於是觀色內動神貌外

移忽正山巾而言曰蓋聞幽居獨善見譏往聖
儻不遺滕叟亦願順來命

頌

大法頌 有序

皇帝以湛然法身不捨本誓神力示現降應茲
上龍顏日角參漏重瞳衡表連珠文爲玉斗自
納麓開基天地之德已布封唐啓跡日月之照
先明百揆之序方舜九河之導均禹尚弘事殷
之禮且屈在田之則自五鼎朝飛告赤文之瑞
其雨七日受綠色之符神器有歸鼎運斯集焦
門厭棄德之君鮪水發白旄之陣然後受皇天

之睠命、當四海之樂推、豈假祀蚩尤於沛庭、託
河冰於王霸、於時鳳凰裂序、蒼蒼舛度、乃選五
石以補之、坤軸傾斜、積冰發坼、乃緯九藪而正
之、陰兔兩重、陽鳥三足、乃定王業以暉之、攝提
乖方、孟隄失紀、乃置清臺而辨之、維冠冕於已
頽、綴珩珮於旣毀、自憑玉几、握天鏡、履璿璣而
端拱、居巖廊而淵默、於今三十有二載也、是以
天德一於上、地數二於下、復朗參辰、不易日月、
兩曜如合璧、五精如布珠、禋宗類昊、虔上禮澤、